



REPUBLIKA E SHQIPËRISË

MINISTRIA E MBROJTJES

MINISTRI

Nr. 52/1 prot.

Tiranë, më 22.01. 2018

URDHËR

Nr. 78, datë 22.01. 2018

PËR

**MIRATIMIN E RREGULLORES PËR HETIMIN ADMINISTRATIV TË KËRKESËS
SË SINJALIZUESIT PËR MBROJTJEN NGA HAKMARRJA
NË MINISTRINË E MBROJTJES**

Në mbështetje dhe në zbatim të pikës 4, të nenit 102 të Kushtetutës, të ndryshuar; shkronjës “f”, të pikës 2, të nenit 13, të ligjit nr. 44/2015 “Kodi i Procedurave Administrative”; ligjit nr. 64/2014 “Për pushtetet dhe autoritetet e drejtimit e të komandimit të Forcave të Armatosura të Republikës së Shqipërisë”, i ndryshuar; të ligjit nr. 60/2016 “Për sinjalizimin dhe mbrojtjen e sinjalizuesve”; të vendimit të Këshillit të Ministrave nr. 816, datë 16.11.2016 “Për strukturën, kriteret e përzgjedhjes dhe marrëdhëniet e punës së punonjësve të njësisë përgjegjëse në autoritetet publike në zbatim të ligjit nr. 60/2016 “Për sinjalizimin dhe mbrojtjen e sinjalizuesve” dhe të rregullores “Për hetimin administrativ të sinjalizimit dhe mbrojtjen e konfidencialitetit në ILDKPKI”,

URDHËROJ:

1. Miratimin e rregullores “Për hetimin administrativ të kërkesës së sinjalizuesit për mbrojtjen nga hakmarrja në Ministrinë e Mbrojtjes”, bashkëlidhur dhe pjesë e pandarë e këtij urdhri.
2. Me këtë urdhër të njihet i gjithë personeli drejtues i drejtorive në Ministrinë e Mbrojtjes,

Shtabin e Përgjithshëm të Forcave të Armatosura, në Komandat e Forcave dhe strukturat e tyre vartëse dhe repartet e institucionet në vartësi direkte të Ministrisë së Mbrojtjes dhe Shtabit të Përgjithshëm të Forcave të Armatosura.

3. Njësia përgjegjëse për sinjalizimin dhe mbrojtjen e sinjalizuesve në Ministrinë e Mbrojtjes caktohet me urdhër të ministrit të Mbrojtjes.
4. Për zbatimin e kësaj rregulloreje ngarkohet njësia përgjegjëse për sinjalizimin dhe mbrojtjen e sinjalizuesve në Drejtorinë e Inspektimit të Përgjithshëm në Ministrinë e Mbrojtjes, e cila është përgjegjëse për administrimin e dokumentacionit dhe zbatimin e procedurave për sinjalizimin dhe mbrojtjen e sinjalizuesve.
5. Përgjigjet për zbatimin e kësaj rregulloreje personeli i drejtorive në Ministrinë e Mbrojtjes dhe Shtabin e Përgjithshëm të Forcave të Armatosura, në Komandat e Forcave dhe strukturat e tyre vartëse dhe repartet e institucionet në vartësi direkte të Ministrisë së Mbrojtjes dhe Shtabit të Përgjithshëm të Forcave të Armatosura.
6. Ndjek zbatimin e këtij urdhri sekretari i përgjithshëm i Ministrisë së Mbrojtjes dhe shefi i Shtabit të Përgjithshëm të Forcave të Armatosura.

Ky urdhër hyn në fuqi menjëherë.





REPUBLIKA E SHQIPËRISË
MINISTRIA E MBROJTJES

RREGULLORE

PËR

**HETIMIN ADMINISTRATIV TË KËRKESËS SË SINJALIZUESIT PËR MBROJTJEN
NGA HAKMARRJA NË MINISTRINË E MBROJTJES**

Tiranë, Janar 2018

Neni 1

Rregullorja për hetimin administrativ të kërkesës së sinjalizuesit për mbrojtjen nga hakmarrja në Ministrinë e Mbrojtjes bazohet në ligjin nr. 60/2016 “Për sinjalizimin dhe mbrojtjen e sinjalizuesve”, “Kodin e Procedurave Administrative”, si dhe në bazë të urdhrave, udhëzimeve dhe akteve të tjera nënligjore të miratuara nga ministri i Mbrojtjes dhe ILDKPKI-ja.

Neni 2

Objekti i kësaj rregulloreje është përcaktimi i rregullave për procedurën e shqyrtimit të hetimit administrativ të kërkesës së sinjalizuesit për mbrojtjen nga hakmarrja, në zbatim të ligjit nr. 60/2016 “Për sinjalizimin dhe mbrojtjen e sinjalizuesve”.

Neni 3

Në këtë rregullore termat e mëposhtëm kanë këto kuptime:

1. “Autoritet publik” ka të njëjtin kuptim me atë të dhënë në ligjin për të drejtën e informimit.
2. “Hakmarrje” është çdo veprim i drejtpërdrejtë ose jo i drejtpërdrejtë, ose kërcënim, i kryer nga organizata me natyrë diskriminuese, disiplinore ose që, në një formë tjetër të padrejtë, dëmton interesat e ligjshme të sinjalizuesit dhe që rezulton nga sinjalizimi.
3. “I sinjalizuar” është një ose më shumë persona, ndaj të cilëve bëhet një sinjalizim, sipas ligjit nr. 60/2016, në lidhje me një veprim ose praktikë të dyshuar korrupsioni.
4. “Mbrojtje” është mbrojtja e sinjalizuesit nga hakmarrja, sipas mekanizmit të përcaktuar në kreun V, të ligjit nr. 60/2016.
5. “Njësia përgjegjëse” është organi i posaçëm në Ministrinë e Mbrojtjes me urdhër të veçantë të ministrit dhe i ngarkuar me detyrën e shqyrtimit të hetimit administrativ të sinjalizimit dhe shqyrtimin e kërkesës për mbrojtjen e sinjalizuesit.
6. “Sinjalizim” është raportimi i informacionit nga ana e sinjalizuesit te njësia përgjegjëse ose ILDKPKI-ja për veprime apo praktika të dyshuara korrupsioni, të kryera në vendin e tij të punës në strukturat vartëse të Ministrisë së Mbrojtjes.
7. “Sinjalizues” është individ, i cili aplikon ose është në marrëdhënie pune, ose ka punuar më parë në strukturat e Ministrisë së Mbrojtjes, pavarësisht nga natyra e marrëdhënies së punës

ose kohëzgjatjes së saj, si dhe nëse paguhet ose jo, që sinjalizon një veprim ose praktikë të dyshuar korrupsioni.

8. “Veprim ose praktikë e dyshuar korrupsioni” është një veprim ose mosveprim, fakte ose rrethana të kryera në strukturat e Ministrisë së Mbrojtjes, për të cilat sinjalizuesi dyshon në mirëbesim, sipas këtij ligji, se mund të përbëjë korrupsion.

Neni 4

1. Veprimet procedurale të njësisë përgjegjëse në Ministrinë e Mbrojtjes kryhen në përputhje me ligjin nr. 60/2016 dhe në rast të mosparashikimit nga ky ligj, sipas Kodit të Procedurave Administrative.
2. Njoftimet për veprimet procedurale, për të cilat njësia përgjegjëse në Ministrinë e Mbrojtjes cakton afate, duhet të përmbajnë paralajmërimin e shprehur mbi pasojat e mosrespektimit të afatit.

Neni 5

Mbrojtja kundër hakmarrjes

1. Sinjalizuesi, i cili sinjalizon një veprim ose praktikë të dyshuar korrupsioni, sipas ligjit nr. 60/2016, mbrohet ndaj çdo masë hakmarrëse të marrë ndaj tij nga strukturat e Ministrisë së Mbrojtjes, duke përfshirë, por pa u kufizuar në:
 - a. shkarkimin nga puna;
 - b. pezullimin nga puna ose të një, ose më shumë detyrave;
 - c. transferimin brenda ose jashtë strukturës;
 - ç. uljen në detyrë;
 - d. uljen e pagës dhe/ose të shpërblimeve financiare;
 - dh. humbjen e statusit dhe të privilegjeve;
 - e. mosngritjen në detyrë;
 - ë. heqjen e së drejtës për të marrë pjesë në trajnime;
 - f. vlerësime negative në marrëdhënien e punës;
 - g. forma të tjera të hakmarrjes në lidhje me punën.
2. Çdo akt i hakmarrjes ndaj sinjalizuesit është i pavlefshëm.
3. Nëse sinjalizuesi dëshiron të vendoset në një strukturë tjetër brenda institucionit të Ministrisë së Mbrojtjes, për të mbrojtur veten nga reagime kundër tij në mjedisin e tij të afërt të punës, paraqet kërkesë me shkrim te njësia përgjegjëse në Ministrinë e Mbrojtjes, e cila i

rekomandon lëvizjen shefit të Shtabit të Përgjithshëm të FA-së dhe ministrit të Mbrojtjes.

4. Ministria e Mbrojtjes dhe Shtabi i Përgjithshëm i FA-së marrin masat e përshtatshme për të mundësuar një lëvizje të tillë. Në rast se Ministria e Mbrojtjes nuk ndërmerr asnjë masë për transferimin e sinjalizuesit, ky i fundit i drejtohet me kërkesë të arsyetuar ILDKPKI-së.

Neni 6

1. Sinjalizuesi, i cili pretendon se është subjekt i një akti hakmarrjeje, fillimisht duhet të paraqesë kërkesë për mbrojtje te njësisë përgjegjëse e organizatës.
2. Njësia përgjegjëse merr menjëherë masat dhe në çdo rast, jo më vonë se 10 ditë nga paraqitja e kërkesës, vendos me akt të ndërmjetëm të arsyetuar për riparimin e pasojave të paligjshme nga akti i hakmarrjes. Në rast të shkeljes së këtij afati, kërkesa e sinjalizuesit paraqitet tek ILDKPKI-ja, që vendos brenda 10 ditëve nga marrja e kërkesës për riparimin e pasojave të paligjshme të aktit të hakmarrjes.
3. ILDKPKI-ja, brenda 5 ditëve nga data e marrjes së një kërkesë për mbrojtje nga hakmarrja, njofton me shkrim sinjalizuesin për regjistrimin e pretendimit dhe emrin e personit pranë ILDKPKI-së, i cili do të ndjekë çështjen.

Neni 7

1. Njësia përgjegjëse në Ministrinë e Mbrojtjes heton administrativisht pretendimet për hakmarrje për të përcaktuar nëse ka shkaqe të arsyeshme për të besuar që ka ndodhur, është duke ndodhur ose pritet të ndodhë një akt hakmarrjeje.
2. Njësia përgjegjëse në hetimin administrativ, i kërkon me shkresë strukturës të provojë që masat e marra në dëm të sinjalizuesit janë bazuar në shkaqe të ndryshme dhe që nuk lidhen në mënyrë të drejtpërdrejtë ose të tërthortë me sinjalizimin. Struktura ka barrën e provës në këtë proces dhe i përgjigjet njësisë përgjegjëse me shkrim brenda 10 ditësh nga data e marrjes së kërkesës.

Neni 8

1. Struktura dhe sinjalizuesi bashkëpunon me njësinë përgjegjëse në Ministrinë e Mbrojtjes për përcaktimin e fakteve dhe rrethanave të nevojshme për zgjidhjen e çështjes së aktit të hakmarrjes ndaj sinjalizuesit. Struktura është e detyruar të paraqesë informacione, prova, dokumente, deklarata apo për t'u paraqitur personalisht përpara njësisë përgjegjëse.
2. Struktura çdo deklaram apo argument të saj e paraqet me shkrim.

Neni 9

1. Gjatë hetimit administrativ njësia përgjegjëse, me qëllim përcaktimin e gjendjes së fakteve dhe rrethanave që kanë lidhje me çështjen, mund:
 - a. të mbledhë deklaratat nga palët, dëshmitarët dhe ekspertët;
 - b. të marrë dokumente dhe dokumente të tjera të dokumentuara nëpërmjet mjeteve fotografike, të regjistrimit ose mjeteve të tjera teknike;
 - c. të vizitojë vende të caktuara.
2. Kur një provë, nga e cila varet zgjidhja e çështjes së aktit të hakmarrjes ose që ndikon në sqarimin e saj, ka rrezik të zhduket ose të vështirësohet, ose bëhet e pamundur marrja e saj, njësia përgjegjëse kryesisht apo me kërkesën e sinjalizuesit, mund të vendosë marrjen më parë të kësaj prove (sigurimi i provës).
3. Njësia përgjegjëse që zhvillon procedurën administrative mund të vendosë sigurimin e provës edhe përpara fillimit të procedurës administrative. Sigurimi i provës mund të bëhet edhe në çdo fazë të procedurës administrative. Përgjegjësia për sigurimin e provave bie mbi njësinë përgjegjëse.

Neni 10

1. Njësia përgjegjëse njofton me shkrim sinjalizuesin, brenda 10 ditëve nga data e marrjes së kërkesës, për statusin e hetimit administrativ të kërkesës për mbrojtje dhe për çdo veprim procedural të ndërmarrë.
2. Pavarësisht nga afatet e njoftimit, njësia përgjegjëse është e detyruar t'i përgjigjet çdo kërkesë për informacion me shkrim, paraqitur në çdo kohë nga sinjalizuesi në lidhje me kërkesën e tij.

Neni 11

1. Nëse në përfundim të hetimit administrativ rezulton se është kryer një akt hakmarrjeje ndaj sinjalizuesit nga autoriteti publik, njësia përgjegjëse i drejtohet me shkrim organit kompetent, sipas legjislacionit në fuqi, për të urdhëruar autoritetin publik për marrjen e të gjitha masave për riparimin e shkeljes së kryer. Drejtori i Drejtorisë së Inspektimit të Përgjithshëm parashikon në shkresë edhe rekomandimin konkret për llojin e masës që duhet të merret.
2. Nëse organi kompetent nuk merr masat e kërkuara nga njësia përgjegjëse, kjo e fundit me miratim të ministrit të Mbrojtjes, ia përcjell çështjen ILDKPKI-së dhe sipas rastit, nëpërmjet strukturës përkatëse, e dërgon çështjen në gjykatën kompetente.

Neni 12

Procedura e hetimit administrativ të kërkesës për mbrojtje nga hakmarrja përfundon sa më shpejt të jetë e mundur dhe në çdo rast jo më vonë se 60 ditë nga data e regjistrimit të kërkesës.

Kjo rregullore hyn në fuqi menjëherë.